

Top chors vol. 7 – Nadal rumantsch

In bel regal da Nadal

■ (rtr) Radiotelevision Svizra Rumantscha RTR preschenta il nov disc cumpact en la retscha Top chors. Quel cuntegna 27 da las pli bellas chanzuns da Nadal en ils idioms rumantschs ed er chanzuns estras interpretadas da diesch divers chors, dals chantauturs Alexi e Marcus e dad in quartet da clarinettas.

Nadal – la festa da la legria, da la glisch, la festa da la pasch, era la festa dal chant e da la musica! En la rimnada da chanzuns «Consolaziun dell'olma devoziusa» chatt'ins blers chants da Nadal. Tgi na conuscha betg «Bunas novas», «Glisch nuvia-la», «O stalla ventireivla», «Igl unfant divin», «Dorma, dorma o Bambin», «Da mesanotg fideivlamein», «Da Nadalnotg en sogn ruaus» u las veglias chanzuns da Nadal ladinas «Gesu, tü meis Signur» e «L'infant naschieu'ns»? Identificaziun chantica da la festa da Nadal par excellence! Gion Antoni e Gion Giusep Derungs han tschentà quests chants tradiziunals per chor. Ultra da questas chanzuns en tun popular cuntegna Top chors vol. 7 era cumposiziuns originalas da Tumasch Dolf, Gion Duno Simeon, Andreia Augustin, Alfred Oswald,

Carli Scherrer e chanzuns estras transladas en rumantsch sco «Tedlei o fideivels/Adeste fideles», «Susani» e sa chapescha «Clara notg/Stille Nacht» en ina interessanta versiun per chor e harmonium. Munida vegn questa part vocala cun la «Pintga suite da Nadal, op.186a» da Gion Antoni Derungs. I sa tracta qua da tschintg chants da Nadal ord la «Consolaziun dell'olma devoziusa» tschentads per in quartet da clarinettas. Top chors vol. 7 cumpiglia registraziuns fatgas da RTR tranter 1980 e 2013. D'udir èn las furmaziuns: Chor d'affons Mustér, Chor d'affons Surselva, Chor da giuvenils grischun, Chor dals seminarists Cuira, Chor dils Larischs, Chor masdo Surmeir, Cor da baselgia Müstair, DRS-Advents-Singers, Ensemble de Canto, Ensemble Cantus Firmus Surselva, ils chantauturs Alexi e Marcus ed il quartet da clarinettas cun Rita Meier, Marc Brühlmann, Josias Just e Martin Zimmermann.

Distribuziun: Radiotelevision Svizra Rumantscha, Via da Masans 2, 7002 Cuira
081 255 75 75, rtr@rtr.ch
Pretsch da vendita: 19.50 francs + spediziun
Infurmaziuns: www.rtr.ch/butia



Il cover dal
nov disc cumpact.